

Den Hochgelerten Fürsichti-
gen vnd Weisen Herren/Bürgermeistern vnd
Rath/der Statt Nürnberg/meinen Gebietenden
vnd Günstigen Herren.



Hochgelert Fürsichtig Erbar
vnd Weise Herren/ es ist on allen zweiffel
E. S. L. W. gnugsam kundt vnd wissende/
mit was grossem fleiß vnd hohem ver-
stande/ alle Kunst vnd scharpffsinnige er-
findung/ was vns dann zu zeitlicher wol-
fart / vnd leiblicher erhaltung nutz vnd
notwendig/von den Alten (vnsere vorfa-
ren) erstlichen erfunden vnd auffbracht/
auch mit was grosser fürsichtigkeit / vns
die selbigen ihre vielfeltige nützliche erfin-
dungen (als ihren nachkommenden) also

gutwilliglichen mitgetheilet vnd nachgelassen haben. Welche Kunst vnd
mancherley scharpffsinnige erfindung/ob sie gleich wol alle samen inn ge-
mein/dahin fürnemlichen gericht sindt/das sie jederman/nach mancher-
ley gelegenheit vud notturfft/nützlichen vnd vortheilig seyend / merckett
wir doch das eine für der andren/ein sonderlichen zweck/oder gesetztes zyl
für ihr hat/darauff sie inn sonderheit gerichtet ist. Dann (wie gnugsam
für augen) sind etliche solcher vilfeltigen Kunst / vnd scharpffsinnigen
erfindungen/fürnemliche auffkommen/vnd bissher in stetigem gebrauch
blieben/darumb das sie für andren zu freundlicher/friedlicher/vnd ges-
selliger Menschlicher versammlung / oder Bürgerlichen standes vnd we-
sens/also gar notwendig/das jr keins wegs mit füg zu geraten. So wer-
den auch der mehrer theil in ehren vnd werden gehalten jrer sonderlichen
frucht vnd nutzbarkeit halb/die sie reglichen bringē mögen / wie vns dan
weiter auch etliche allein von wegen/das sie fast lustig vnd kurtzweilig/in
sonderheit anmütig vnd wolgefellig sind / vnd wirt also war genommen/
das ein jede Kunst (wie gesagt) auff ein sonderlich endlich fürnemmen
gerichtet ist. So wir aber alle Kunst vnd scharpffsinnige erfindungen
(nicht allein dasselbig so vns von den alten vnsere vorfaren/ also gutwil-
liglichen mit getheilet worden/sonder auch alles das/was oberlangst her
nach/vnd noch reglichen new erfunden vnd auffbracht wirt) für vns nem-
men/vnd mit fleiß nach dieser ermelten abtheilung/oder vnterscheidung/
erwegen/vnd ersuchen/befinden wir/das vnter allen Kunstē keine ist/
die zu dem selbigen / das ihr in keinen weg zu manglen oder geraten / auch
damit solchen vilfeltigen trefflichen nutz/vnd vnglaublichen vortheil bring-
ge/vnd zu dem allen auch mit solcher sonderlichen ergetzlichkeit/gelernet/
geübt/vnd gebraucht werde/als die trefflich Kunst der Architectur / wel-
che billich von allen verstendigen die nützlichst / notwendigst / lieblichst
Kunst/für den andern allen geachtet wirt. Aber dieses orts werde nicht
nach gemeinem brauch für die Architectur verstanden/mancherley arbeit

aa ij der